



Broj: 01-50-1-15-36/08
Sarajevo, 8. 10. 2008. godine

Z A P I S N I K

36. sjednice Predstavničkog doma
Parlamentarne skupštine Bosne i Hercegovine,
održane 8. oktobra 2008. godine

Sjednica je počela u 11,07 sati. Prisustvovalo je 37 poslanika. Odsustvo su opravdali: Azra Alajbegović, Zlatko Laghumdžija, Rifat Dolić, Savo Erić i Mirko Okolić.

Iz Vijeća ministara BiH sjednici su prisustvovali ministri: Bariša Čolak, Mladen Zirojević, Božo Ljubić, Sredoje Nović i Tarik Sadović, te zamjenik ministra Mijo Krešić. Zbog razmatranja Zakona o klasifikaciji djelatnosti, prisustvovao je i predstavnik Agencije za statistiku BiH.

Iz međunarodnih organizacija na sjednici su bili predstavnici: OHR-a, OSCE-a, NATO-a, EUFOR-a, EUPM-a i američke ambasade, kao i nevladine organizacije Centri civilnih inicijativa.

U uvodnim napomenama predsjedavajući je obrazložio izmjene i dopune ranije predloženog dnevnog reda.

Iz dnevnog reda skinut je Prijedlog zakona o fiskalnim kasama jer je nadležna komisija zatražila produženje roka, s obzirom da je odgodila razmatranje u prvoj fazi dok Vijeće ministara BiH ne dostavi mišljenje o Prijedlogu zakona.

Predsjedavajući je također upoznao poslanike da je iz dnevnog reda skinut Izvještaj o radu Državne komisije za reviziju odluka o naturalizaciji stranih državljanja u BiH, za period od 1.1.2008. do 31.6.2008., jer Zajednička komisija za ljudska prava nije mogla održati sjednicu zbog nedostatka kvoruma, pa tako nije dostavljeno mišljenje o ovom izvještaju.

Predsjedavajući je podsjetio poslanike da je s dnevnog reda 35.sjednice skinut Prijedlog zakona o klasifikaciji djelatnosti zbog odsustva predstavnika predlagача, pa je ovaj prijedlog zakona uvšten u dnevni red 36.sjednice.

U raspravi o prijedlogu dnevnog reda Bakir Izetbegović zatražio je da se s dnevnog reda skine Inicijativa klubova poslanika u vezi sa uskraćivanjem prava glasanja određenom broju građana i protuzakonitog omogućavanja biračkog prava građanima susjednih zemalja (podnosioci: klubovi poslanika SDA, HDZ, Stranke za BiH, SDPBH i HDZ '90), koju su navedeni klubovi podnijeli na 35.sjednici. Dodao je da ima saznanja da se na terenu već radi na ovom pitanju, pa je predložio da se rasprava odgodi dok se ne dobiju materijali od SIPA-e i Vijeća ministara BiH.

Nije bilo drugih diskusija o prijedlogu dnevnog reda.

Predsjedavajući je dao na glasanje prijedlog Bakira Izetbegovića. Ovaj prijedlog usvojen je jednoglasno, sa 34 glasa "za" (Federacija BiH 23, RS 11).

Predsjedavajući Lozančić konstatirao je da 36. sjednica Doma ima sljedeći

D N E V N I R E D

1. Poslanička pitanja i odgovori;
2. Prijedlog zakona o izmjeni Zakona o klasifikaciji djelatnosti u Bosni i Hercegovini (prvo čitanje);

3. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost;
4. Prijedlog zakona o graničnoj kontroli, s Mišljenjem Zajedničke komisije za odbranu i sigurnost;
5. Prijedlog zakona o izmjenama i dopunama Zakona o proizvodnji naoružanja i vojne opreme (prvo čitanje);
6. Prijedlog zakona o popisu stanovništva i domaćinstava u Bosni i Hercegovini 2011. godine, s Mišljenjem Ustavnopravne komisije, predlagač: poslanik Momčilo Novaković;
7. Informacija o krivičnim djelima protiv života i tijela, s naglaskom na nasilje u porodici, za 2006. i 2007. godinu, te tendencijama u prva tri mjeseca 2008. godine;
8. Inicijativa poslanika Milorada Živkovića s 34. sjednice Doma, održane 3.9.2008., u vezi s predstojećim popisom stanovništva;
9. Imenovanje po tri člana u zajedničke komisije oba doma radi usaglašavanja imenovanja:
 - a. ombudsmena za ljudska prava BiH i
 - b. zamjenika generalnog revizora BiH.

Ad. 1. Poslanička pitanja i odgovori

Predsjedavajući Lozančić konstatirao je da su za ovu sjednicu odgovore na pitanja dobili poslanici:

- Branko Dokić – na pitanje postavljeno na 31. sjednici,
- Husein Nanić – na dva pitanja postavljena na 32. sjednici,
- Šemsudin Mehmedović - na pitanje postavljeno na 32. sjednici,
- Sadik Bahtić – na pitanje postavljeno na 32. sjednici,
- Lazar Prodanović – na pitanje postavljeno na 32. sjednici,
- Slavko Jovičić – na dva pitanja postavljena na 32. sjednici,
- Denis Bećirović – na pitanje postavljeno na 32. sjednici,
- Jovan Todorović – na pitanje postavljeno Agenciji za sigurnost hrane BiH na 33. sjednici,
- Slavko Matić - na pitanje postavljeno na 33. sjednici
- Selim Bešlagić - na pitanje postavljeno na 33. sjednici.
- Centralna izborna komisija BiH dostavila je odgovore na pitanja koja su Slavko Matić i Niko Lozančić postavili na 34. i 35. sjednici Doma.

Odgovore na pitanja komentirali su poslanici: Sadik Bahtić, Slavko Jovičić, Lazar Prodanović i Slavko Matić.

U okviru komentara, Denis Bećirović izrazio je nezadovoljstvo odgovorom na pitanje: „Zašto Vijeće ministara BiH ne pristupi realizaciji Rezolucije o ubrzavanju procesa pristupanja BiH u članstvo EU? Takva je i objavljena i u „Službenom glasniku BiH.“ „Na to pitanje dobio sam odgovor čak na tri stranice, međutim, problem je što nijedna rečenica na te tri stranice nije vezana za ovo pitanje. Tako da ponovo obnavljam ovo pitanje sa željom da dobijem zaista konkretan odgovor na konkretno pitanje.“ Pitanje glasi: **„Zašto Vijeće ministara BiH ne pristupi realizaciji Rezolucije o ubrzavanju procesa pristupanja BiH u članstvo EU? Takva je i objavljena i u „Službenom glasniku BiH.“**

U okviru komentara, i Slavko Jovičić je obnovio sljedeća pitanja:

“1. Postavit ću dopunsko pitanje: Kada će se poštovati i ispoštovati nacionalna struktura zaposlenih u pogledu konstitutivnosti naroda po Ustavu BiH i kada će se ta struktura izbalansirati prvo na nivou institucija BiH?

2. I naravno, ono drugo pitanje, kada će se vratiti, u mom mandatu, dakle, sljedećem nekada ili nikada, imovina Srpske pravoslavne crkve u Sarajevu? ...Evo, ja ću sad naravno proširiti pošto je tako u odgovoru mi pisalo, zalažem se da se vrati imovina i katoličke crkve, gdje nije vraćena u cijelost BiH i Islamske zajednice u cijelost BiH.“

Nova pitanja postavili su poslanici kako slijedi:

Šemsudin Mehmedović:

1. „Prvo je Ministarstvu sigurnosti BiH: Tražim da mi se dostavi sistematizacija i popunjenost po nacionalnoj strukturi u SIPA-e, od direktora do posljednjeg izvršioca (zaposlenika).“
2. „Drugo pitanje Ministarstvu za ljudska prava i izbeglice BiH i Ministarstvu civilnih poslova BiH Vijeća ministara BiH: Kada će se riješiti pitanje povratka imovine Fati Orlović, tj. rušenje crkve u njenom dvorištu?“
3. „I treće pitanje Ministarstvu prometa i komunikacija BiH Vijeća ministara BiH: Kada će se ispoštovati Odluka o konstitutivnosti u RTRS-a, jer se radi o javnom TV servisu, tj. kada će se struktura zaposlenih nacionalno izbalansirati u skladu s pomenutom odlukom?“

Husein Nanić:

„Postavljam **pitanje Komisiji/povjerenstvu za očuvanje nacionalnih spomenika**: Da li će preispitati svoju Odluku o proglašenju nacionalnog spomenika BiH Stare džamije u Lubardi, Općina Bužim, a na osnovu zahtjeva Rijasetu Islamske zajednice u BiH?“

2. Vladi Federacije BiH i Federalnom ministarstvu kulture i sporta: „Šta ste i šta ćete poduzeti da se objekat Stare džamije zaštiti od daljeg propadanja i mogućih vrlo opasnih posljedica po mjesno stanovništvo s obzirom da se nalazi u centru naselja i da mu prijete samoobrušavanje koje može imati za posljedicu gubitak ljudskih života a s obzirom na obaveze koje ste dužni poduzeti u skladu s pomenutom odlukom?“ (misli se na Odluku o proglašenju nacionalnog spomenika)

Sadik Bahtić:

„Kada će Vijeće ministara BiH predložiti ovom domu zakon o državnoj imovini u sklopu kojeg bi se popisala i državi BiH vratila sva imovina bivšeg Saveza komunista, koju je SDP nezakonito uzurpirao i od 1990. godine ubire velike prihode? Također tražim da Vijeće ministara BiH, putem državnih institucija, pokrene postupak nadoknade direktne i indirektno štete, tj. da SDP državi BiH plati sva izgubljena sredstva sa zateznom kamatom.“

Branko Dokić:

1. „Dokle će predsjedavajući Predsjedništva BiH gospodin Haris Silajdžić nanositi veliku štetu državi BiH svojim javnim istupima izvan BiH?“
2. „Da se svim poslanicima u Predstavničkom domu Parlamentarne skupštine BiH dostave cjelovita izlaganja predsjedavajućeg Predsjedništva BiH Harisa Silajdžića, prilikom obraćanja Generalnoj skupštini UN-a u Njujorku i članovima Parlamentarne skupštine Vijeća Evrope u Strazburu i da se Dom odredi prema tim govorima na narednoj, a najkasnije na sjednici koja bi bila za mjesec dana.“ (inicijativa Kolegiju)

Denis Bećirović:

- „1. Šta je konkretno uradilo Vijeće ministara BiH s ciljem eliminiranja ekstremnog siromaštva u BiH u 2007. i 2008. godini?“
2. Šta je konkretno uradilo Vijeće ministara BiH u pravcu donošenja zakona o penzijsko-invalidskom osiguranju na nivou BiH, a kojim bi trebalo da se osigura jednak tretman penzionera i jedinstvene osnove penzione politike?“
3. Šta je konkretno uradilo Vijeće ministara BiH na pojednostavljivanju procesa u vezi s registracijom imovine u BiH?“
4. Koliko je u prosjeku potrebno dana u BiH da bi se dobila dozvola za poslovanje?“

Bajazit Jašarević:

„Kada će Predsjedništvo BiH, na prijedlog Vijeća ministara BiH, dostaviti prijedlog zakona koji sadrži Budžet institucija BiH za 2009. godinu, u skladu s članom 128. Poslovnika Predstavničkog doma Parlamentarne skupštine BiH? Da li je Vijeće ministara BiH dostavilo Prijedlog budžeta Predsjedništvu BiH i ako nije, kada će ga utvrditi i dostaviti?“ (pitanje upućeno Predsjedništvu BiH i Vijeću ministara BiH)

Sefer Halilović:

„Ko koristi imovinu bivšeg Socijalističkog saveza radnog naroda BiH, bivšeg Socijalističkog saveza omladine BiH i Saveza sindikata?“ (pitanje upućeno predsjedavajućem Vijeća ministara BiH)

Niko Lozančić:

„Imam jedno pitanje koje postavljam Centralnoj izbornoj komisiji BiH i Agenciji za istrage i zaštitu BiH.

Prvo pitanje za SIPA-u: Ima li ikakvih operativnih saznanja i je li preduzimala ikakve aktivnosti, ako je imala takva saznanja da je u prethodnom izbornom procesu bilo kupovanja glasova od strane političkih stranaka, koalicija ili zvaničnika, nezavisnih kandidata, bilo kojeg subjekta koji je učestvovao u prethodnom izbornom procesu? Ako ima, šta su preduzeli povodom takvih saznanja?

I isto pitanje Centralnoj izbornoj komisiji BiH, ako ima takvih saznanja, jesu li išta preduzimali i hoće li išta preduzimati i hoće li takav način pribavljanja glasova uticati na regularnost prethodnog izbornog procesa?“

Ad. 2. Prijedlog zakona o izmjeni Zakona o klasifikaciji djelatnosti u Bosni i Hercegovini (prvo čitanje)

Predsjedavajući Lozančić dao je kratke uvodne napomene.

Nije bilo rasprave.

Prilikom izjašnjavanja Prijedlog zakona usvojen je u prvom čitanju. „Za“ je glasalo 29 poslanika (Federacija BiH 21, RS osam). Glasova „protiv“ i „suzdržanih“ nije bilo.

Ad. 3. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost

U uvodnim napomenama predsjedavajući Lozančić iznio je hronologiju razmatranja ovog zakonskog prijedloga otkad je dostavljen u parlamentarnu proceduru, naglasivši da je po treći put Mišljenje nadležne komisije o principima negativno.

O ovoj tački vođena je duga rasprava u kojoj su učestvovali: Beriz Belkić, Momčilo Novaković, Selim Bešlić, Slavko Jovičić, Adem Huskić, Šefik Džaferović, Milorad Živković, Jozo Križanović, Drago Kalabić, Ekrem Ajanović, Milica Marković, Denis Bećirović, ministar Tarik Sadović, Sadik Ahmetović, Azra Hadžiahmetović, Niko Lozančić, Halid Genjac i Bakir Izetbegović.

U raspravi je Šefik Džaferović predložio sljedeći zaključak:

„Prijedlog zakona o kontroli kretanja oružja i vojne opreme vraća se Vijeću ministara BiH radi razmatranja amandmana četiri međunarodne organizacije.

Nakon izjašnjavanja Vijeća ministara BiH bit će nastavljena parlamentarna procedura.“

Prilikom izjašnjavanja, predsjedavajući je, u skladu s Poslovníkom, na glasanje dao Mišljenje Zajedničke komisije za odbranu i sigurnost.

„Za“ je glasalo sedam, „protiv“ 20, „suzdržala“ su se tri poslanika.

Predsjedavajući je konstatirao da Mišljenje nije usvojeno i da se nadležnoj komisiji Prijedlog zakona ponovo vraća na razmatranje, a prijedlog zaključka Šefika Džaferovića određuje se kao smjernica za daljnju raspravu o Prijedlogu zakona.

Ad. 4. Prijedlog zakona o graničnoj kontroli, s Mišljenjem Zajedničke komisije za odbranu i sigurnost

I za Prijedlog ovog zakona predsjedavajući je u uvodnim napomenama iznio hronologiju razmatranja i naglasio da je po treći put negativno Mišljenje nadležne Zajedničke komisije za odbranu i sigurnost o principima predloženog zakona.

Ministar Tarik Sadović je prije rasprave podnio obrazloženje Prijedloga zakona.

U raspravi je učestvovao Šefik Džaferović i za ovaj zakonski prijedlog predložio sljedeći zaključak:

„Prijedlog zakona o graničnoj kontroli vraća se Vijeću ministara BiH radi izjašnjavanja o amandmanima DIKAF-a.

Nakon izjašnjavanja Vijeća ministara BiH bit će nastavljena parlamentarna procedura.“

Prilikom izjašnjavanja, predsjedavajući je na glasanje dao Mišljenje Komisije.

"Za" je glasalo šest, "protiv" 22, "suzdržala" su se dva poslanika.

Predsjedavajući je konstatirao da Mišljenje nije usvojeno i da se Komisiji vraća i ovaj prijedlog zakona, a kao smjernica za dodatno razmatranje daje se zaključak koji je predložio Šefik Džaferović.

Ad. 5. Prijedlog zakona o izmjenama i dopunama Zakona o proizvodnji naoružanja i vojne opreme (prvo čitanje)

U uvodnim napomenama predsjedavajući je rekao da je Zajednička komisija za odbranu i sigurnost dala pozitivno mišljenje o Prijedlogu zakona iz ove tačke, tj. da je podržala principe Prijedloga zakona.

Nije bilo rasprave.

Prilikom glasanja Dom je, sa 29 glasova "za" (Federacija BiH 22, RS sedam) i jednim "suzdržanim", usvojio Prijedlog ovog zakona u prvom čitanju.

Ad. 6. Prijedlog zakona o popisu stanovništva i domaćinstava u Bosni i Hercegovini 2011. godine, s Mišljenjem Ustavnopravne komisije, predlagач: poslanik Momčilo Novaković

Predsjedavajući Lozančić je u uvodnim napomenama podsjetio da Ustavnopravna komisija nije podržala principe Prijedloga zakona i da se Dom izjašnjava o Mišljenju Komisije.

Momčilo Novaković je, u svojstvu predlagачa, podnio obrazloženje Prijedloga zakona.

O ovoj tački dnevnog reda vođena je duža rasprava u kojoj su učestvovali: Milorad Živković, Šefik Džaferović, Drago Kalabić, Niko Lozančić, Bakir Izetbegović, Sadik Ahmetović, Selim Bešlić, Momčilo Novaković, Slavko Jovičić, Lazar Prodanović, Ekrem Ajanović, Milica Marković, Denis Bećirović, Velimir Jukić, Azra Hadžiahmetović, Remzija Kadrić i Jozo Križanović.

Poslije rasprave, ponovo je, u svojstvu predlagачa, govorio Momčilo Novaković.

Prilikom glasanja, "za" Mišljenje Komisije glasalo je 19 poslanika (Federacija BiH 18, RS jedan), "protiv" je glasalo osam, "suzdržala" su se tri poslanika. Kako nije bilo entitetske većine, provedeno je usaglašavanje u Kolegiju kao komisiji i nije postignuta saglasnost. U drugom krugu glasanja "za" Mišljenje glasalo je 20, "protiv" sedam – svi iz Republike Srpske, "suzdržala" su se tri poslanika.

Predsjedavajući je konstatirao da je usvojeno Mišljenje Ustavnopravne komisije o principima Prijedloga zakona, te da je, prema tome, Prijedlog zakona odbijen.

Ad . 7. Informacija o krivičnim djelima protiv života i tijela, s naglaskom na nasilje u porodici, za 2006. i 2007. godinu, te tendencijama u prva tri mjeseca 2008. godine

Predsjedavajući Lozančić podnio je osnovne uvodne napomene o Informaciji, u kojima je pozvao predsjedavajućeg Ustavnopravne komisije da pojasni dio Mišljenja kojim Komisija konstatira da je potrebno provesti širu raspravu o Informaciji u parlamentarnim komisijama.

Predsjedavajući Ustavnopravne komisije Šefik Džaferović iznio je pojašnjenje.

Resorni ministar Tarik Sadović šire je obrazložio Informaciju.

U raspravi su učestvovali: Husein Nanić, Mirjana Malić, Martin Raguž, Adem Huskić, Niko Lozančić, Šefik Džaferović, Jozo Križanović, Sead Jamakosmanović, Slavko Jovičić i Selim Bešlić. Nakon rasprave, govorio je ministar Tarik Sadović.

Na osnovu rasprave, Kolegij je usaglasio sljedeće zaključke:

1. **Prima se k znanju Informacija o krivičnim djelima protiv života i tijela, s naglaskom na nasilje u porodici, za 2006. i 2007. godinu, te tendencijama u prva tri mjeseca 2008. godine.**
2. **Zadužuju se komisije (Ustavnopravna komisija Predstavničkog doma, Zajednička komisija za ljudska prava, prava djeteta, mlade, imigraciju, izbjeglice, azil i etiku, Komisija za ravnopravnost spolova i Parlamentarna grupa za populaciju i razvoj) da provedu raspravu o temama koje su obuhvaćene Inforamcijom i da Domu predlože prijedlog zaključaka.**
3. **Na sjednice komisija koje će provesti raspravu potrebno je pozvati predstavnike nadležnih ministarstava, sudova, tužilaštava i nevladinog sektora, kako bi se čula i mišljenja subjekata koji imaju obaveze u ovoj oblasti.**
4. **Nosilac aktivnosti je Komisija za ravnopravnost spolova (organiziranje zajedničke rasprave u saradnji s predsjedavajućim drugih komisija), a rok za provođenje rasprave je 30 dana.**

Ovi zaključci usvojeni su jednoglasno – sa 30 glasova "za" (Federacija BiH 22, RS osam). Adem Huskić predložio je zaključak od kojeg je prilikom glasanja odustao.

Ad. 8. Inicijativa poslanika Milorada Živkovića sa 34. sjednice Doma, održane 3.9.2008., u vezi s predstojećim popisom stanovništva

U uvodnim napomenama predsjedavajući Lozančić podsjetio je da Ustavnopravna komisija nije podržala Inicijativu te da Dom treba da se izjasni o Inicijativi.

Milorad Živković podnio je obrazloženje inicijative.

U raspravi su učestvovali: Azra Hadžiahmetović, Milorad Živković, Momčilo Novaković, Jozo Križanović i Šefik Džaferović.

Prilikom izjašnjavanja, Dom nije usvojio inicijativu iz ove tačke. "Za" je glasalo osam, "protiv" 17, "suzdržala" su se četiri poslanika.

Ad. 9. Imenovanje po tri člana u Zajedničku komisiju oba doma radi usaglašavanja imenovanja:

- a) ombudsmena za ljudska prava BiH i
- b) zamjenika generalnog revizora BiH.

Predsjedavajući Doma Niko Lozančić rekao je da je u međuvremenu Kolegij obavio konsultacije o prijedlogu članova zajedničkih komisija, pa je iznio prijedlog da se za usaglašavanje imenovanja:

- a) ombudsmena imenuju: Ekrem Ajanović, Drago Kalabić i Velimir Jukić;
- b) zamjenika generalnog revizora imenuju: Šemsudin Mehmedović, Vinko Zorić i Hadži Jovan Mitrović.

Martin Raguž je u kratkoj raspravi rekao da će podržati ovaj prijedlog budući da se Kolegij o tome konsultirao, ali da on očekuje da se ispoštuje dogovor da u Domu naroda bude predložen član iz HDZ-a '90. Dodao je da ovo govori u dobroj vjeri da će ovo biti realizirano kako bi bilo moguće provesti usaglašavanje i kako bi ovo ostalo zapisano u transkriptu.

Prilikom glasanja, predsjedavajući je predložio da se Dom u paketu izjasni o članovima obje komisije. Nije bilo protivljenja, pa je provedeno glasanje.

S 25 glasova "za" (Federacija BiH 17, RS osam), jednim "protiv" i dva "suzdržana", u zajedničke komisije oba doma imenovani su za usaglašavanje imenovanja:

- a) ombudsmena za ljudska prava: Ekrem Ajanović, Drago Kalabić i Velimir Jukić i
- b) zamjenika generalnog revizora iz bošnjačkog naroda: Šemsudin Mehmedović, Vinko Zorić i Hadži Jovan Mitrović.

Ovim je realiziran dnevni red sjednice.

Sastavni dio Zapisnika je transkript 36. sjednice.

Sjednica je završena u 18,49 sati.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Niko Lozančić